




TAPAK 7

Modi-i Kolkata semdang aser Subhas Chandra Bose nem akhüm agütsü

TAPAK 10

Thailand Open: Carolina Marin final-i iogo



VOL. XVIII NO. 100 (ADOK 100) DIMAPUR

AMUNGNÜ (SUNDAY)

AENJETI (JANUARY) 24, 2021

₹ 5.00

Covid-19 Nagaland: Nisung 4 dak putet; 4 taneptsü angu

Dimapur, January 23 (TYO): Honibarnü Nagaland nung nisung pezü dak COVID-19 aliba putet aser nisung pezü taneptsü angu.

"Dimapur nung nisung 3 aser Mokokchung nung nisung 1 ka dak COVID-19 aliba putet. Maneni, Dimapur nungi nisung pezü taneptsü angu" ta Health & Family Welfare Director, Dr. Denis Hangsing-i ashi.

Nagaland nung COVID-19 aliba puteta alir nisung 88 süogo aser nisung 142 tanga state temi ogo, ta paisa shisem.

District balala nung COVID-19 putetba: Dimapur (6,465), Kohima (3,777), Mon (605), Peren (504), Tuensang (245), Mokokchung (192), Zunheboto (142), Phek (47), Kiphire (41), Wokha (39) aser Longleng (19).

"Nisung 12,076 rongnung Traced Contacts 4,980, armed forces personnel 4,667, tanga state tem nungi arur 1,857 aser Frontline Workers 572 lir" ta Dr

Hangsing-isa metetdaksü.

District balala nung tang anepalurtem: Kohima (50), Dimapur (41), Mokokchung (12) aser Mon (1).

"Tang anepalurtem rongnung nisung 14 dak shirangba yimya terara lir aser 2 oxygen agidar. Nisung 88 dakbo shirangba yimya kecha mali" ta paisa ashi.

Taneptsü angurtem: Dimapur (6,291), Kohima (3,669), Mon (593), Peren (504), Tuensang (243), Mokokchung (171), Zunheboto (139), Phek (47), Kiphire (40), Wokha (35) aser Longleng (10).

Nagaland nung COVID-19 alitsü akok ta temolung melemi bilemba sample 1,23,806 tendangogo. RT-PCR ajanga sample 72,958, TrueNat ajanga sample 37,060 aser Rapid Antigen Test ajanga sample 13,917 tendang, ta Honibarnü COVID-19 bulletin ajanga metetdaksü.

Home Minister Amit Shah-i 69 buba NEC session tenzüksü



January 23, 2021 nü Union Home Minister aser North Eastern Council (NEC) chairman Amit Shah-i Shillong nung 69 buba NEC plenary session tenzüksüdang agiba noksa angur.

Shillong, January 23 (Agencies): North Eastern Region ya linük renloktsü atema 'engine' tasenba lir aser Narendra Modi-i aniba sorkari alima map nung Northeast ajungkettsü aser azükaru bener arutsü atema meranger, ta Union Home Minister aser North Eastern Council (NEC) chairman Amit Shah-i ashi.

Honibarnü Shillong nung 69 buba NEC plenary session lapoktsüdang Union Home Minister Amit Shah-i iba osang metetdaksü.

Centre sorkari Northeast nung terenlok bener arutsü atema alizüng yur inyaker, ta pai ashi.

"Küm aika Northeast

senzüka yutsü saka PM Modi kübok yimjung aser terenlok bener aruogo" ta Amit Shah-isa ashi.

Modi-i Prime Minister inyaksü tenzükndang India renloktsübaji North-East renlokba dak dang keta lir ta ashi, ta paisa shisem.

Centre-i Northeast nung terenlok bener arutsü atema tanen makai inyaker aser iba nung NEC-i rongsenkettsüng tsütsü renlokda tsüba tongti mapa inyaker. NEC ajanga terenlok mapa aika inyakba den külemi Northeast nung rongsenkettsüng indaktsür, ta Amit Shah-isa metetdaksü.

(Maneni tapak 2 nung...)

PM Modi-i Assam nung kibong lakh 1.06 nem 'land pattas' agütsü



Honibarnü Prime Minister Narendra Modi-i Assam kübok Sivasagar district nung kibong lakh 1.06 nem land patta (land allotment certificates) lema agütsüba sentong nung agiba noksa angur. (Sivasagar, January 23)

Guwahati/ Jorhat, January 23 (Agencies): Honibarnü Prime Minister Narendra Modi-i Assam kübok Sivasagar district nung kibong lakh 1.06 nem land patta (land allotment certificates) lema agütsüogo.

BJP-i aniba Assam sorkari küm aika state nung ali malirtem indang khuret agientsüogo.

Tanü PM Modi-i Sivasagar kübok Jerenga Pothar nung Assam nung den New Year aser Bhogali Bihu salem lemsatop.

"Independence anguba sülena, nisung lakh aika nem ali temeten magütsüi dang aru. Assam nung nisung lakh 6 shi ka ali temeten maliasü. Tanü Assam sorkari nübortem nem ali temeten agüja khuret tulu ka agientsüogo. Assam nung

lisopur nisungtem nem ali temeten agütsüba ajanga parnok kümzüka ayutsü" ta Modi-isa metetdaksü.

AASU-i PRIME MINISTER ANEMALUNGKAKAIT:

Tanü Prime Minister-i Sivasagar semdangdang All Assam Students' Union (AASU)-i tanü Jorhat nung badge tanak khaloker lungkak ait.

AASU-i anogo asemnü Citizenship Amendment Act (CAA) anema lungkak aitba nung badge tanak khalokba ya shilem ka liasü.

AASU-i CAA agientsü akhangba den külemi ozügi memelaba Bangladeshi nung puteta yoktsü aser draft Environmental Impact Assessment (EIA) 2020 notification agientsü akhang.

AASU-isa Assam Accord indang Clause VI tekaratiba nung mapa küma inyaksü akhang.

Centre-i Assam senzüka yutsüba aser PM Modi-i nangzüka meinyakba nenshitsü atema tanü onoki PM Modi-i Sivasagar district semdangba mapang lungkak aiter, ta AASU lennir kati ashi.

BJP-i aniba state sorkari Hokolbar nikongdang AASU-i tesem balala nung ayonga agiba sentong tashiyim agi anendaktsüba aitsür, ta AASU-isa metetdaksü. Parnokisa Assam Chief Minister Sarbananda Sonowal aitsü.

"Tesüiba mapang Sonowal-i state nung lisopurtem atema yimdong nung lungkak aitba amadokogo" ta AASU-isa ashi.

Delhi police-i Republic Day tractor parade agitsü melaogo

New Delhi, January 23 (Agencies): Republic Day nung aluyimertemi Delhi nung tractor parade alitsü Honibarnü Delhi Police-i temelaba agütsüogo.

Aluyimertemi asüng police nem parnoki parade agitsüba indang lenmang metetdaksü.

Aluyimertem Delhi-i aitsü melaogo, ta Swaraj India president Yogendra Yadav-i ashi.

"January 26 nü aluyimertemi 'Kisan Gantantra Parade' agitsü. Lenmang noktanga aliba lapoktsütsü aser onok Delhi-i aitsü. Onok (aluyimertem aser Delhi Police) tsüngda lenmang atema angatettepogo aser taonung onoki sentong renemtsü" ta Yadav-i ashi.

"Aluyimertem parade ajanga Republic Day benjungmong mesüra security nung timtem

kecha magütsütsü. Aluyimer lennirtemia parade nung shilem agitsüpar ajak dang tashi angaa timi shilem agitsü mepishia metetdaksüogo" ta Yadav-isa metetdaksü.

"Ni parade nung shilem agitsü aliba aluyimertem dang tashi angatsü aser committee-i tuyuba sülen anidaktsü mepishir" ta Bharatiya Kisan Union lennir Gurnam Singh Chaduni-i ashi.

Punjab, Haryana aser Uttar Pradesh anüolen tsütsü aliba aluyimertemi ita ka tema Delhi arrtsü anasa lungkak aityonga arur.

Arrtsü nung lungkak aiterem dak alia, aluyimer noklang aikati pei pei tractor nung linük wako aser balloons alenloker Delhi leni aoer.

"Khanauri (Punjab) aser Dabwali (Haryana) nungi tractors aser trolleys 30,000 tema Delhi nung tractor parade nung adentsü atema apusogo" ta Honibarnü Bharti Kisan Union (Ekta-Ugrahan) general secretary, Sukhdev Singh Kokrikalan-i ashi.

Parnok taonung Tikri arrtsü atongtsü imlar, ta paisa ashi.

Iba tractor parade nung state 20 shi ka nungi aluyimertemi shilem agitsü imlar. Parnoki tractor nung linük wako alenloktsü aser political party shinga indang wako mamshitsü ta metetdaksüogo.

Taoba mapang Delhi Police-i aluyimertem dang Delhi telungi maittsü saka arrtsü nung dang lungkak aitsü atema mesüzüksü merang saka makok.

NECU Global Leadership Training Lapokogo

Dimapur, Aenjeti/January 23 (TYO): North East Christian University (NECU), Dimapur, Nagaland-i January 22, 2021 nü virtual Leadership Empowerment Training mapang "Covid-19 mapang aser tarutsü Khristan kulisüba "Christian Witness in Times of Covid-19 and Beyond" Omen nung ajemdaker India, New Zealand, aser Germany nungi tesayur takotet aikati, Covid-19 amala wara ajurudang Lai ratetba yim; timtem toudhi ajurudang counseling; Khristan kulisü; Khristan taküm aser ochi kuli; timtemer anebaluba amala onük aika nung tangazükba agütsü.

Training sentong ayonger aser yanglur, Prof. Wati Longchar-i, ", linük 9 nungi lenir 161 iba training nung adentsü apply süa lir. Parnok timba ka India nungi, aser Bangladesh, Canada, Myanmar, Nepal, New Zealand, Taiwan, Pakistan, aser UK nungia lenir aikati training nung shilem agitsü

apply süa lir" ta ashi. Nisung 161 rongnung tebur 94 aser tetsü 67 lir, ta paisa ashi.

Maneni Baptist dang masü, Presbyterian, Church of North India, Church of South India, Assembly of God, Mar Thoma, Roman Catholic, Pentecostal/revivalist, aser jurila Arogotem aika iba training nung adentsü.

Maneni Rev. Taku Longkumer, shiba International Ministries Country Coordinator lir, paia "Covid-19 wara mapang nüburtem mapa meinyaktetsüsa nokdangaka, yamai alima ajak nungi nübur aika tajangzük ngutetsü asoshi lemanng tajung lapoktsüba ya Tsüngremer temoatsü tulu" ta shisema liasü.

Iba training lapok sentong nung Rev. Dr. Benjamin Chan, International Ministries Area Director of East and South Asia-i salem osang den NECU aser ABAM den külemi teka amteper iba training agütsü lemanng lapoktsüba asoshi pelaba lemsatep. Rev. Dr. Akheto

Sema, NECU Chancellor aser CBCNEI General Secretary-i, asen lima aser Arogo nung temelenshi adokdaksünera, leniri mapang shia training balala nung adentsü jangratsüla ta tayongzükba agütsü. Maneni Vice-Chancellor Dr. Darlando Khathing-i, alima rangben Covid-19 den raraba den yarisemtsü asoshi NECU-i iba training ya angati agütsü lemtet, ta metetdaksü. Prof. Longchar-i iba training program ya Myanmar Baptist Convention den longjemer Karen, Kachin, Chin pur asoshi, aser Nepal Khristan lenirtem atema tenzüksü sendong yangludaki ta ashi. Prof. Longchar ya Waromung nung lir aser pa ya ABAM aser IM-ABC tena longjemer Asia nung theological education consultant mapa inyaker. Leadership training ya January 29 nü nungi tenzüksü aser Aor kar denüa lira lemanng lapoktsütsü, ta paisa metetdaksüogo, ta Dr. Arenla Lkr, CTC, Mokokchung-i sangdong ka ajanga metetdaksü.

Chesezu nung Subhash Chandra Bose asoba anogo amung



Chesezu yimtsüng nung January 23 nü Netaji Subhash Chandra Bose sor küm 125 ajungba anogo sentong ka ayongzuka amungba mapang ketdangsertem, yimtsüng lenirtem aser kaketshirtem tangokba noksa nung angur.

Kohima, Aenjeti/January 23 (TYO): Netaji Subhash Chandra Bose sor küm 125 ajungba anogomung tanü Chesezu yimtsüng (Phek District) nung ayongzuka mungogo, kong yimtsüng lenirtem aser arishi küm 93 tain Vezo Swuro, shiba Netaji den metettepa liasü parnoka dena liasü.

Vezo Swuro, shiba Netaji den metettepa liasü, pai Chesezu nung Netaji mungzükba indang tajangshiba aser otsü tatsüka lemsatep.

Pier Tours, Kohima Proprietor, Kejaroko Pieru-i o jembiba mapang, Indiatourism tenüng nung Chesezu nung iba sentong agitsü atema pelashishia agizükba atema yimdaklirtem dang kanga pelaba lemsatep.

Paisa, Chesezu yimtsüng ya eco-tourism destination ka akümtsü lenmanng sadema lapoka aliba lemsatepba den tarutsü nung yimtsüng nongita yaritsü mulunga aliba lemsatepa liasü.

Kasa mapang nung Chesezu

Village Council ex-chairman Muley Khesoh-ia, Netaji sor küm 125 ajungba anogomung Chesezu yimtsüng nung amungtsü atema shimba atema Indiatourism dang kanga pelaba lemsatep.

Paisa, iba sentong ayongzuka agiba ajanga lokti ajungmesoba atema Indiatourism dang kanga pelaba lemsatepba den lanurtem dang Netaji tsüngsü nung anidaksü ajungshi.

SOP tem temulungdang yur kaketshir 13 densema nisung 45 shi "Netaji at Chesezu" omen nung ajemdaker Art competition ka ayongzuka agiogo.

Rapra Swuro aser Thiyiveyi Nyekha nati sobaliba kensü nung Netaji aser Japan nungertem Chesezu nung mungzükba indang ken ka aten aser kasa mapang nung Nuvetalu Nyekha aser Nukhrutalu Nyekha nati Chesezu nung Netaji-i toktsür aoba tajangshiba aser puti otsü indang ken ka aten.

Iba sentong ya Vesezo Ringa lenisüba kübok agia liasü.

DPRO Dimapur-i organic dragon fruit wine/juice sayatsü



January 23 nü DPRO Dimapur, Lolano Patton aser Dream Dragon Fruit Farm, kibur Lucy Ngullie nati Dream Dragon Fruit Farm nung yangluba, 100 percent organic Dragon Fruit Wine/juice sayaba noksa nung angur.

Dimapur, Aenjeti/January 23 (TYO): District Public Relations officer Dimapur, Lolano Patton-i January 23 nü Dream Dragon Fruit Farm Shitovi Village Dimapur nung 100 percent organic Dragon fruit wine/juice yangluba sayaogo.

Sentong nung o jembiba

mapang DPRO Dimapur, Lolano Patton-i, Dream Dragon Fruit Farm, kibur Lucy Ngullie nem international jenjang nung 100% organic Dragon Fruit Wine/ juice sayaa iba alizüng tasen tongtetba atema tenüngsang agütsü, aser ashiba agi iba ajanga state rongsenketsüng nung teyari

agütsütsü. Laisa, Lucy Ngullie-i kanga meranga inyakba aser aluyimertem dang bendanga agüja inyaka tangar dak metaloker malitsü atema lenmanng sayuba atema tenüngsang agütsü.

Dream Dragon Fruit Farm kibur Lucy Ngullie-i, new organic winery indang lemsatepba mapang, iba mapa ya dragon fruit farm maneni inyakyonga aotsü atema rongsen bendenloksü nükjidong nung inyak, ta ashi. Laisa, Naga nung aluyimertem sorkar dak dang metaloker melei peisasa jenjang yanglutsü nüngdaker ta bilemba lemsatep.

Temetetsükaji Lucy Ngullie-i, yi yanglutsü Philippino nung ka dang angazük aser Organic Dragon fruit Wine/ juice yanglutsü atema tenüngdakba oset ajak Canada nungi bener arua liasü. Lai iba mapa ya 2019 küm tenzük aser yi ya white aser red white ta tapu ana angutsü, aser talinertemi jelja mekaa ayutsüla.

(Tapak 1 nungi...)

atema mapa tenzüksü, ta paisa ashi.

Northeast state timba ka Assam den arrtsü mangatettep adoka lir.

NEC session nung adenba sülen Amit Shah-i Guwahati semdang. Idakji Assam Chief Minister Sarbananda Sonowal-i pa pelaa agizük.

January 24, 2021 nü Amit Shah-i Kokrajhar aser Nalbari nung lokti sentong ana nung adentsü.

Home Minister Amit Shah-i...

North Eastern Region ya tobur tajung aser sobaliba senmanng nung takar lir. Linük nung tourism tesem tongtipang akümtsüsa North East dak tashi lir, ta paisa ashi.

NEC ya North Eastern Region nung rongsenkettsüng aser lokti renlokdahtsütsü atema nodal agency lir. North Eastern Region kübok Arunachal Pradesh, Assam, Manipur, Meghalaya, Mizoram, Nagaland, Sikkim aser Tripura

adener.

NE STATE TEM DANG OLEMTEP AJANGA ARRTSÜ ANGATETTEPTSÜ AYONGZÜK:

Union home minister Amit Shah-isa Northeast state tem dang olemtep ajanga arrtsü ken o tem angatetteptsü ayongzük.

Assam nung Assembly Elections agiba sülen Northeast State tem tsüngda arrtsü ken o tem angatetteptsü

MLA Keneizhakho-i Peducha Sub-Centre asadang



MLA Keneizhakho Nakhro den lenirtem Peducha Sub-Centre semdangba mapang tangokba noksa nung angur.

Kohima, Aenjeti/January 23 (TYO): MLA Keneizhakho Nakhro-i, Kohima district kübok Peducha yimtsüng nung Peducha Sub-Centre January 22 nü semdang aser tenüngdakba osetem lemja liasü.

Lanur lokti, yimdak yimtsüyimbu, Panchayat züngsemtem aser staff tem den sensaksemba mapang Nakhro-i, health care system tajung ka indang osang prokshiba nung nisung ajaki tongtibang shilem agitetsü, ta ashi.

Nakhro-i, yimtsüng nung ketdangsürtem dang Sub-Centre nung inyakyim kanga junga meita atatsü aser mapa takok ngua inyakyonga aotsü atema health ketdangsürtem den teka amteper inyaksü mepeshi.

Kasa mapang nung Peducha yimtsüng chairman Dokho Vielie-i, Peducha Sub-Centre ya tang tashi nungbo compounder ka medeni inyaksangshidar, ta ashi.

Paisa, jongdak mapang atema ambulance ka nüngdaker ta ashi, kechiyong yimtsüng ya National Highway-29 nung lir.

Taoba mapanga MLA-i, 8th Western Angami A/C kübok primary healthcare centre, Sub-Center aser Health & Wellness centre tem semdanga tenüngdakba osettem lema agütsüogo.

Constituency kübok centre balala semdangba mapang pai doctor, staff aser yimdaklirtem den health care inyakyim tali tashi taitba kümshitsü atema sensaksema arudar.



Agartala nung All India Kisan Sabha (AIKS) züngsemtemi farm laws anema Raj Bhavan leni lungkak aita jajayonga aodang agiba noksa angur. (Agartala, January 23)

RPF-i Guwahati Railway Station nung tanur 5 kümzük

Guwahati, January 23 (Agencies): Northeast Frontier Railways (NFR) indang railway protection force (RPF)-i Guwahati Railway Station nung tanur pungu kümzükogo.

Hokolbar anepdang 6:45 ako meta Guwahati Railway Station nung RPF lady constable kati tanur tetsür ka aruba angu. Lai tanutsüla dang oa la tenüing asüngdangdang Arunachal Pradesh kübok Pasighat nungi la jena aru ta ashi.

Tanutsüla lar tsüraburtem aser kinungertem dang memetdaksüi Delhi nung oa mapa inyaksü atema apuso ta ashi.

RPF lady constable-i tanutsüla RPF office-i anir ao aser idakji lai bena aliba

yangkhu nung reprangdang Aadhaar card ka, school identity card ka, süoshi kar, mobile ka, bank passbook ana aser Rs 1,430 bena aliba angu.

RPF ketdangsürtemi tanutsüla tedi dang osang sangoktsü aser laji Railway Childline Guwahati ket nung yutsü.

Ano tanga tatalokba ka nung, RPF den Railway Childline Guwahati ketdangsürtemi Hokolbarnü Guwahati Railway Station mita aodang platform number 7 nung tebur tanur kar senzua aliba rüshi.

Parnok dang asüngdangdang, par pezü jagi ki toktsür Guwahati nung mapa inyaksü atema aru ta ashi.

Par pezü rongnung asemji

Bihar kübok Begusarai nungi aser pezübubaji Samastipur nungi lir. Ajisüaka, parnoki tsüraburtem indang contact number ka danga magütsütet.

Par pezüprong Railway Childline Guwahati ket nung yutsü.

Ano maneni, RPF ketdangsürtem den government railway police aser Tripura nung SB ajanga Agartala Railway Station nung brown sugar packet 16 bena aliba tetsür ka apu.

La ya Silchar nungi Agartala-i aruba liasü aser la kinungbo dena liasü saka pa jena ao.

La ket nung bena aliba brown sugar ji Rs 6 lakhs shi alang liasü.

Tripuranung Netajisorküm 125 ajungbabenjungamong

Agartala, January 23 (Agencies): Honibarnü nübortemi Netaji Subhas Chandra Bose sor küm 125 ajungba benjungamong.

Centre sorkari tawa tu taküm nungi Subhas Chandra Bose indang tasoba anogo 'Parakram Divas' ta ser amongtsü metetdakja liasü.

Tripura kübok tesem balala nung political party tem, clubs, social organizations, NGOs, trade unions aser public-i sentong balala ayongzüka among.

Tripura education department-i Agartala nung aliba Netaji Subhash School nung sentong tajung ka ayongzüka agi.

Iba sentong nung Tripura education minister Ratan Lal Nath aser West Tripura MP Pratima Bhowmik na aden.

Netaji indang tasoba anogo ya BJP, CPI(M) aser Congress indang party office tem nung ayongzüka among.

CPI(M)-i taoba mapang Centre sorkar dang 'Deshprem Divas' (patriotism day) amongtsü takhangba agüja liasü.

Dharmanagar nung iba dak sendakba nung sobaliba sentong ka ayonga agidang telok 50 temai shilem agia liasü.

Iba sentong ya Tripura assembly deputy speaker Biswabandhu Sen-i lapoktsü aser linük dak sendakba shilem balala agia liasü.

Arunachal Pradesh nung China yimtsüing kecha mali: Pema Khandu

Shillong, January 23 (Agencies): Arunachal Pradesh kübok India lushi nung yimtsüing ka kumtetogo ta asüba osangji tiyazü ta Arunachal Pradesh Chief Minister Pema Khandu-i metetdaksü.

Arunachal Pradesh nung kiojen yanglua aliba satellite noksatemji India lushi nung masü, ta CM Pema Khandu-i ashi.

China nungeri yangluba kiojenji McMohan line nung lir aser iba tesem ya 1959 küm nungi China kübok azüoka lir, ta paisha ashi.

India nung Central Minister tem aser BJP tongti lennirtemi

ashiba ama Pema Khandu-ia iba osang metetdaksüogo.

Pema Khandu ya tang Northeast Council (NEC) session nung adentsü atema Shillong nung lir.

"China-i Arunachal Pradesh parnok meyong ta asübaji kuli kecha mali" ta Khandu-isa ashi.

Külen, China-ia Arunachal Pradesh nung yimtsüing ka kumtetba osang aitsüogo.

Kiojentemji parnok ali nung yangluba lir, ta China-i ashir.

"China lushi nung kumtetba Arunachal Pradesh ta ajaba ya onoki kodanga magizüker" ta Chinese foreign ministry spokesperson Hua Chunying-i ashi.

AR-i Mizoram nung Rs 6.72 lakh alangba kozüapu

Aizawl, January 23 (Agencies): 23Sector Assam Rifles nung Serchhip Battalion-i Mizoram kübok Bulfekjawl nung kozüjang bosta 40 apu.

Osang tejangja ka angazükba sülen Hokolbarnü Serchhip Battalion aser Customs department-i Zokhawthar nung mita aodang kozüjangji apu.

Parnoki apuba kozüjang indang jenjangji Rs 6.72 lakh shi asütsü akok ta ashir aser Customs Preventive Force ket nung agütsü.

Taoba hopta Assam Rifles-isa Mizoram nung Myanmar nungi bener aruba kozüjang apu. Iba indang jenjangji Rs 6.35 crore shi asütsü aser iba dak sendakba nung nisung asem puogo, ta ketdangsürtemi ashi.

Brihostibar aser Hokolbar anogotem Mizoram nung kozüjang bosta 260, heroin gram 612.8 aser Methamphetamine süngjang 2,69,000 puogo, ta Assam Rifles ketdangsürtemi metetdaksü.

BTCCEMBoro-i ULFA(I) dangtemai adoktsümepishir

Udalguri, January 23 (Agencies): Bodoland Territorial Council (BTC) chief executive member (CEM) Pramod Boro-i Paresh Barua-i aniba United Liberation Front of Assam(ULFA) (I) dang temai adoktsü mepishia metetdaksüogo.

ULFA (I) züngsemtemi ozüing alema mapa inyakba anentsüla aser civil society nung adentsüla, ta Boro-i ashi.

Hokolbar nikongdang Army indang Garhwal Regiment tesep nung bomb ka pokdaksüba atema ULFA (I)-i tenüing agia metetdaksüogo.

Parnoki public dang

Republic day mokdangtsü shiogo aser January 26 anepdang 1:00 ako nungi nikongdang 6:00 ako tashi mokdangtsü ayongzüko.

Taoba ABSU lennir Boro ya 3rd Bodo Accord nung sign asürtem rongnung ka lir. "Onoki telungpur teloktem akhümtsübur saka asenoki tajangzük aser takoksa asadangtsüla" ta pai ashi.

"Ni Paresh Baruah aser tanga ULFA (I) züngsemtem dang temai adoktsü aser yimtenren olemtep ajanga onüktem angatetteptsü mepishir" ta Boro-i metetdaksü.



**DISTRICT ADMINISTRATION &
DISTRICT LEVEL CENTRE FOR WOMEN-
MAHILA SHAKTI KENDRA, MOKOKCHUNG.**



**CELEBRATES
BETI BACHAO BETI PADHAO WEEK
21st-26th January 2021**

**Tanur medanglokdangjungi atsüapong shimshiba
aser anojungi atsüapong jangjatsü atema
tendangba (pre-natal Determination) ya Pre-
Conception and Pre-natal Diagnostic Techniques
Act 1994 kübok aibelen yonger aiter.
Nu bena alir tsürabur dang atsüapong jangjatsü
tetendangba agitsü nokdangdi.**



TIR YIMYIM YIMOBILEM (EDITORIAL)

DIMAPUR AMUNGNÜ, AENJETI (JANUARY) 24, 2021

Taochi tsünglu

Akhi tejen putu nung ainker Hosea aliba putu mapang Israel nungertem jakla yimya aser libaliro ya reprangdangra, tanü asenok jakla yimya aser libaliro den kanga mesüktepa lir. Hosea tapu 10 ji kodang züngdangdir, tekong ka nung ashir, parnok takarba kümli, tenla ki teimba yangluli aser rongsen teimba renlokli, temeshi tongshi tajungba yanglushili ta asüba asenoki angur. Aji kanga junger ta bilema kodang ano tekong 2 ji züngdir, item tenla kintem aser tongshitemji Kibubai raksatsütsü ta shia angur. Aji taoksatsüka lir, kechiba Kibubai Pa külemtsü tenla ki yanglubatem aser temeshi tongshi topur tajungba küma yanglubatemji magizüker ? Atangji, Tsüngremi Samuel ainker dang ashi ama, nisungibo tema topur ajung repranger saka Tsüngremibo temulungjang topur ajungba dang repranger. Aji oda, Israel nungertemi yangluba tenka kitem aser temeshi tongshitemji tereprangtsü nung kanga topur junga liasü. Item tenla kitem jagi parnok yimti aser temeketema kanga topur jungdaksür asütsü. Ajisüaka, item tenla kitem nungji Israel nungertemi pei tanüla aser temulungjang ajak agi Tsüngrem külemtsü asoshi masü saka bendanger tsüngremtem külema shi azü jangraba aser azüapong mapatem inyaksü dang bilem aser parnoki yamaji inyak. Parnoki Tsüngrem tenüng nung inyaksü azüngashibatam meinyaki parnok inyaknüsü inyaka ali. Iba tiaji asenoki tekong 3 nung shia angur. Yimsüsürtemi tenangzükba meinyak aser nübortemia chuba dena mezügmeshia jembibi. Aji oda, nisung shingaia tenangzükba aser tejembiba ama meinyak nungji, Israel nungertem rongnung temulung melemtep aser meputep onsara adok. Shingaia ochi meinyak, anungji anogo shia parnok okadak kati ka anema ken o benoka jembiba agi sünga liasü. Iba ama mapang nunga, Tsüngremibo Israel nungertem meima bilem, anungji Pai parnok dang Hosea ainker ajanga temulung meyipa Tsüngremer taochi agizüksü ajungshi. Atangji, Hosea ainker Tsüngrem o ashibaji Israel nungertemi angashi saka magizük, kechiyong parnok temulungjang kanga meranga kümer liasü. Aji oda, parnok asoshi ainker nungi Tsüngrem o angashibaji yimya ka ama dang liasü. Ibayongji, Tsüngremi Israel nungertem dang pei asoshi taochi angutsüsa peisasa ochi aser teindang metsü prokang aser iba metsüji junga meitsüsa ali temerangji tanük küma angensangang ta kasa tapu nung tekong 12 nung shia aliba angur. Tetezü, Tsüngremi Israel nungertem dang tiyazü shitak ama jembiba aser ochimashi mapatem ochishia inyaker ama inyakba jaklatem nungi pilaang ta ashiba lir. Asenok ama Israel nungertema aluyimer kin asünungji, Tsüngremi Pa taochi o aser temoatsü parnok taküm nung agizükteta amongtsü atema aluyimba mapa den athishia jembibi. Aji oda, aluyimeri tsünglu aruba mapang ali nung tzü junga mongdakja metsü meidaktsütsü asoshi ali temerang agi anükanüka küma agensar yutsüba ama, asenok taküm nunga Tsüngrem taochi o agizüka mongtetsüsa asenok mulungjang anüka akümtsü nüngdakba indang Tsüngremi Hosea ajanga Israel nungertem den jembibi. Atangji, ali merangba agi tsünglu junga magizüktet ama, Tsüngrem taochi magizüktetsüsa Israel nunger mulungjang merangbaji, parnoki tekülembo külem saka parnoki Yihovah Tsüngrem masü süngyanglu tsüngrem külem, parnoki tenla kibo yanglu saka parnoki Tsüngrem tsüngdang ochishia melitet. Parnok inyakba ochimashi aser azüapong mapatem ajakji parnok asoshi shitak inyaker amai dang liasü. Item Israel nungertemi inyakba mapatem denji kodang asenoki tanü inyakba mapatem aser asenok libaliru medemdangdir, asenok mapa aser jaklaang tamajung aser asenok mulungjangang temerangba asadangtetsü. Iba amaisa lira, asenok rongnunga, ano, meputepang tali adoksü aser asenok tangar kübok alarsa alitsü. Tsüngremibo asenok dangi taochi tsünglu yokner aser moatsüner, anungji asenok mulungjang Tsüngrem o amongtsüsa asenok renemtsüla. Tamajung aser meindang mapa agi takar kümaka, itemji asenoki ngua pi keti ora, kechi asütsü ? Hosea ainker den jembiba kasa Tsüngremi tanü asenok nema ibaji angatetdaksüner.

OLEMSABANG

Naga nunger dangi

T. Lima Tzuwar
Ungma Impang, Artang ward.

Tamasa ozü kibongi küm tasen salem iba paper azünger ajak dangi abener. Temeim amangbapur tajungtem küm tasen den pei mulungjang tasen agi melenshir iba küm tasen nung liyonga aser jajayonga aotsü merangdi arungma. Temenen mojingi asen mulungjang matidangtsüsa ner kibong ozü kibong nür jalajabaso aser semchirtem kanga dang junga azüoka Khristan kibong ka ama alitsü asenok ajaki merangdi. Oda pei jalajabaso aser asen semchir dang nungi asen tsüraburtemang tamajungba süra ajibo tsüngeni pei techanu anishiba amai asütsü. Anungji asen Aotsür Aor aser Nagatsür aser Naga nunger tsürabur tajungtem aseni anir asen chirnurtem aser semchirtem tajungleni anishia Tsüngrem akümtsüba pei tanüla bilema alitsü aser asen kodang südir süaka kotaki aotsü dang merangtsüla. Iba lima yabo mulumi lima ama dang asünung aser temenen mojingi sünga alinung shingaia iba temenen tatidang makoker. Saka kodang asen mulungjang nung teti Tsüngrem bilema lidir aser tanüla agi sünga lidir temeneni matidangtsü asüküm, ngasangatem, tenükmerem, pei kinungtsü aser pei kinungbo shibai pei abuani yutsür tangar kinungtsü aser kinungbo dak tamajung inyakdir mesüra aji temenen nung tsüker. Aier asangur shibai tzü nung Baptitir kanga kümdanga tatidang nung metsüktsü merangtsüla. Shibai tatidang mekoki tamajung inyakdir yakta arogo nungi atsünga atatsüla, yamaji pei kinungtsürtemi aser pei kinungbotemia temenen tatidang mekoki tamajung inyakra arogo nungi atsünga atatsüla. Yamaji asünungang arogo kaji meshiteta alitsü aser shitakba khristan limaji aji asütsü amai bilemer. Koba yimstüng aser koba town nung südir süaka Deacon aser mapangsür shimdir shimaka arogo kaji meshiteta aser asüngteta alitsü asoshi parnoki la taküm koma aser pa taküm koma aji repranga alitsüla aser achiajem nungi aser jembishinü nung kanga kümdanga alitsü merangtsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sayutsüngir, Stephen Lungu Coronavirus tashidak agi süogo



"Billy Graham of Africa" ta naroküm agüja alisang, sayutsüngir, Stephen Lungu (abelen)-i moapu nung sayutsüngidang tangokba noksa nung angur.

January 23, 2021: "Billy Graham of Africa" ta naroküm agüja alisang, Africa nunger sayutsüngir, Stephen Lungu, January 18, 2021 nü coronavirus tashidak agi süogo; pa arrshi küm 78 liasü, ta osang ka ajanga metetdaksü.

Lungu ya African Enterprise nung CEO inyaka lia mapa nungi anisüngzüka liasü.

Pa dak diabetes tashidak keta liasü, ibayongji pa mang agi coronavirus tashidak anema merarateti asü. Talisa tanga tashidak keta alir tantsür-tamburtemi coronavirus tashidak anema merarateter, ibayongji teintet rogotem aika

iba tashidak agi asür.

2014 küm Lungu African Enterprise CEO nungi anisüngzüka sülen pa melensang, Stephen Mbogo-i sangdong ka ajanga Lungu asüba osang metetdaksü.

Tenünsang Ken 116:15 nung ajemdaker Mbogo-i, "Onoki ajaki pa atema sarasadma liasü. Ajisüaka Kibubai pa anisüngzükdaksüba atema onok pelar. Kibuba tenzükertem asübaji Kibuba nükdang senti," ta metetdaksü.

Lungu ya Zimbabwe nung kanga timtema intet aser nisung tamajunger telok nung densema liasü. Mapang ka nungbo pa

leniba nung telok kati Harare, Zimbabwe nung evengelical meeting tagidak mapang nung Khristantem dak "petrol bombs" onlokja liasü.

Pai yamaji inyakaka sayutsüngi o angashiba sülen pai pa taküm Khrista nem bendanga agütsü.

Iba sülen pa sayutsüngir aküm aser Dorothea Mission nung küm aika inyaka liasü.

Mangyim jashi lemsatepa Lausanne Movement for World Evangelization Chairman, Michael Cassidy-i, "Stephen Lungu ajanga kodak nung nisung meyrjang aika alitsü," ta ashi.

Asia kübok linük trok nung Khristantem tetsübu nung alir

January 23, 2021: Asia continent kübok linük trok nung Khristantem reshikangshi tia nung alir; item linüktem nung sorkar aser ketdangsertemi Khristantem anema inyakba nokdangtsü memeranger, ta Khristan advocacy group kati metetdaksü.

Christian advocacy group Open Doors-i ashiba agi, Asia nung Khristantem anema inyakba linüktemji North Korea, Afghanistan, Pakistan, Yemen, Iran aser India lir.

Alima nung Khristantem tamajungba reshikangshiba linük tamajungtiba 50 nung Asia nung aliba linük ya mezüngbuba jenjang nungi jenjang 10buba tashi nung lir.

Item linük nung Khristantem amokmerener, sendoker, tenla kitem raksatsür aser Khristantem dak azüker mesüra tepseter, ta Open Doors report nung shia lir.

Item linük trok nung Khristan nütsüng ajema lir (minority) aser item linük nung Khristan yimsü ya anüdoklen aliba bendang linüktem indang yimsü ka ama züngshir, ta report nung shia lir.

North Korea nung Khristantem apur aser labor camp nung mapa tasak inyakdaksür, mesüra tepseta indoker; tanüngba linük pongu (Afghanistan, Pakistan, Yemen, Iran aser India) nungji ketdangsertem aser tanga yimsü

alia amangertemi Khristantem anema inyaker.

Item linüktem nung Khrisantem puer aoer, tetsürtem kangshia tanga tamangba yimsü dangi meyipdaksür aser tetsürtem taküm raksatsür, ajisüaka item ama osangji aiben memeteter, kechiyong sorkar aser ozüng benokba agency temi nütsüng timba aliba yimsü amangertem peladaksütsü atema aibelenertem anema meinyaker.

Ano item linük kar nungbo Khristantem anema inyaksü atema anti-conversion ozüngtem benoker aser Tsüngrem mezüngmeshiba ozüngtem benoker.

East Asia nung aliba linük (North Korea) nung nütsüng million 26 lir, aser tesüiba küm 20 tashi alima nung Khristantem tamajungtiba reshikangba linükji North Korea lir.

Open Doors-i ashiba agi, tang North Korea nung Khristan 70,000 jungnüa labor camps nung lir. Tang iba linük nung Khristan 400,000 shi lir saka parnok aikati timtemi maitsü atema pei tamangba yimsü mimshir.

North Korea nung secret police-i Khristantem jangjaba sülen labor camps nung ayur mesüra tepseta inoker.

Afghanistan linük nung Islam yimsü toktsüra temerenshi tulu angur, ibayongji

aikati Khristan yimsü dangi meyiptsü tsübur.

Pakistan nung Khristantem ya 'second-class' sensotem ama züngshir aser Khristantem ya tesempatsü nisungtem ama züngshir. Parnok nem mapa tajung maongka magütsür aser mapa tasak inyakdaksür, aser ibaji tanü putu nung alar den kasa lir.

Pakistan nung Tsüngrem mezüngmeshiba ozüngtem nung ajemdaker Khristantem anema inyaker. Nütsüng million 212 aliba linük nung Khristan nütsüngbo shilem 1.59 dang lir.

2011 küm nungi 2015 küm tashi nung Pakistan nung right-wing parties aika poktetogo aser Tsüngrem mezüngmeshiba ken o 1,296 dak tema liasü. Tang iba linük nung Tsüngrem mezüngmeshiba ken o nung aija nisung 80 nem tasüba temerenshi obendang agüja lir.

India nung, talisa Hindi oshi jembiba north tsütsü Hindu nungeri, Khristantemi kangshia Hindu nungertem tamangba yimsü meyipdaksür, ta aija Khristantem anema inyaker.

India nung BJP-i pusema Hindu tentettem Sangh Parivar-i India ya Hindu linük akümtsü atema nükjidong yur inyaker.

Tang alima nung Khristan 8 shia nungi katibosa reshikangshi ajurur aser Asia nung nisung 5 shia nungi anatibo reshikangshia ajurur.

ANOGO ABEN TSÜNGREM DEN

Kü Sülen Anidakang

Matt. 16:24

Asenoki Tsüngrem tatenbaji melatok ama agitsü akok. Asenoki yamaji bilemtsü akok kechiaser Yisui ashi Pa asenok den teti dena alitsü, asenok kolenisa odir Pai anidaktsü (Matt. 28:20). Yisui asenok sülen manidaker; asenoki Pa anidaktsüla. Ne mapa nung atentsü nai Tsüngrem jaoktsü makok. Pa mapa nung atentsü Pai na jaoker. Yisui ashi, "Nenoki ni shim masü, saka Ni nenok shim" (Yn. 15:16). Yisu sullen anidaktsü bendanga tashi angaba nüngdaker. Asenoki asen asoshi tapet lemanng tuyuba Pai magir. Asenok dang masüngdangi, Tsüngremi asenok asoshi tajungtibaji metet.

Yisu sülen anidakba nung nai konga majangshiba ajungshitsü! Shirnok temenen nung pua lir, parnok asoshi Yisui ajepdang na Pa den alitsü. Yisui shia bilemba ama nai bilemtsü. Tanela tenük tapok alir Yisu dangi arua Tsüngrem anguba tepela nai mezüngbuba angutsü. Teraksa taküm yanglushiba nai angutsü. Kibong yanglushiba; talenba nung alir salaba, chiokba; aser mangyimer süneptsüba nai angutsü. Mapang ka Yisu sülen aotsü temüli. Tanga mapang ka nung aninadoktsü atitangtsü. Yisu sülen anidakba tetezü yipru ajanga aoba mesüra tenem kolak nung notakba.

Pa sülen anidaktsü nai anentsü akok. Saka tang tanaben Pa sülen anidakner. Kodang Yisu sülen anidaktsü anener, nai ne mulungka anener. Saka Yisu dangi meyipbaji Pai mulungba nung inyaker. Pa Tsüngrem lir aser na masü. Ajaklen, mashi mapang, mashi jenjang nung nai Yisu sülen anidaktsü mulunga lir asü? Nai Pa sülen anidaktsü akokba lemanngji aji dang lir.

Armenia nunger Tenla ki ka asayamenü art centre ama agitsü



Aenjeti/January 23, 2021: Administration (KOP)-i inyaka Turkey linüki south-central Konya province nung tawa yanglushiba Holy Trinity Armenian Tenla ki ka asayamenü centre ama agitsü atema telemtetba agiogo.

Aso (Century) 19buba nung yangluba Khristantem indang Tenla ki ya 2017 küm tanaben yanglushiba sülen tekülem sentong agitsü mesüra raliwalirtem-i semdangtsü atema melapoktsü liasü.


Iba kiojen tanaben lapoktsü aser World Masters of Humour Art House atema amshitsü.

Iba project ya Aksehir municipality aser Konya Plain Project Regional Development

Administration (KOP)-i inyaka liasü aser Tenla ki yanglushiba nung Turkey nunger lira sen million 3.5 (US sen 475,000) indoka liasü.

Akhidang yangluba Khristantem Tenla ki ya mosque ama amshitsü mesüra religious tourism site ka akümtsü atema taküm Turkey linüki telemtetba agia liasü. Iba sites rongnung Byzantine Chora Tenla ki aser Hagia Sophia densema lir.

US nung amenoka aliba International Christian Concern-ibo, Turkey linüki akhidang Khristantem meyong Tenla kitem mosque küma yanglushir amshiba aser tourism sites atema aitsü.

OLONG PAITEP # 5703**TIPIEN**

1. Nisung jenti
4. Tsük rudenba
6. Temzüng tesashi
8. S _ _ _ i
9. Nisung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

LANGTSÜNGLEN


1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Majinü
13. Tzüma nung senzüba

OLONG PAITEP # 5702 TELANGZÜBA**TIPIEN :**

2. Bangsemo, 6. Tiptem, 8. Jen,
9. Talila, 11. Aren, 12. Tzübo, 14. Alia,
16. Angati, 17. Odi, 18. Azü, 19. Sünglang.

LANGTSÜNGLEN :

1. Yipten, 3. Nüja, 4. Sangro, 5. Milen,
7. Tulu, 10. Laza, 11. Aben, 12. Tiyong,
13. Ajizük, 14. Aitsü, 15. Tasa, 16. Aina.

Noksa nung meputepi aliba 1 bushiang**TANÜBO NAI LANGZÜANG**

Q. UAV alitsü atema Indian army-i telok koba den contract sign sütep?

- A. ideaForge B. Ford C. Accenture D. Jaxa

===== (Taruba adok nung onoki langzütsü)

YASHI ADOK TELANGZÜBA : 104

NAI-A YA METETTER MA?**ALIMA NUNG NÜBURTEMI SAPUA
SEMDANGBA TESEMTEM :**

Taj Mahal



Petra

Forbidden City



1. Eiffel Tower, Paris
2. The Colosseum, Rome
3. Statue of Liberty, New York City
4. Machu Picchu, Peru
5. The Acropolis, Athens
6. The Taj Mahal, India
7. Pyramids of Giza, Egypt
8. Great Wall of China
9. Angkor Wat, Cambodia
10. Petra, Jordan

11. Grand Canyon, USA
12. Stonehenge, England
13. Borobudur, Indonesia
14. Niagara Falls, Canada & USA
15. Bagan, Myanmar
16. Sydney Opera House
17. Mount Kilimanjaro
18. The Louvre, Paris
19. Forbidden City, China
20. Prague Castle, Czech Republic

SUDOKU # 5744

	2	4						7	6	7	9	3	1	4	8	2	5
7	6					8	2		4	8	5	7	9	2	1	3	6
8	9		7	4					3	1	2	5	8	6	7	4	9
5	8				6				1	9	8	2	7	3	6	5	4
			5	9		6	4		5	4	3	1	6	8	2	9	7
9			2	7	8	1	5		2	6	7	4	5	9	3	1	8
4		9				7	6	5	7	2	4	8	3	5	9	6	1
3			1	6	7		9	2	8	5	6	9	2	1	4	7	3
6	7	2			4		8		9	3	1	6	4	7	5	8	2

TELANGZÜBA # 5743**OJANG LUTEP # 5291**

NÜNAG	:																		
TNGOA	:																		
MUNGEEJTTA	:																		
AAKAGJYONI	:																		
NGAART	:																		
ANDG	:																		
EEIMMT	:																		
RESAEYMUTTA	:																		
JAAAKBI	:																		
AAMJKO	:																		

OJANG LUTEP TELANGZÜBA # 5290

TELOK NUNG SEMLOKER TAJUNG ALIBA AJANGA
RONGRONG MAKAI SÜNEPA TEMBANGER

TAN HOPTA ATEMA - KOMA SÜLA ?

Q. Nagaland nung ya Assembly constituency 40 dang aküm nunga koma süla ?

Olong 20 shi nung January 29, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.

Modi-i Kolkata semdang aser Subhas Chandra Bose nem akhüm agütsü



Kolkata, January 23, 2021: Honibarnü Netaji Subhas Chandra Bose sor küm 125 ajungba anogomong nung Victoria Memorial, Kolkata nung Ato kilonser, Narendra Modi aser West Bengal Chief Minister, Mamata Banerjee na tangokba noksa nung angur.

Kolkata (West bengal), January 23 (Agencies): Honibarnü 'Parakarm Divas' anogomong nung Ato kilonser, Narendra Modi-i Kolkata yimti semdang aser Netaji Bhavan

nung Subhas Chandra Bose nem akhüm agüja liasü.

Subhas Chandra Bose sor küm 125 ajungba anogomong nung Ato kilonser Modi-i International conference on

'Re-visiting the legacy of Netaji Subhas in the 21st century' nunga aden.

Paisa Kolkata nung nüngtugu Victoria Memorial semdang. Pa den West Bengal Chief Minister aser Trinamool Congress tongti, Mamata Banerjee aser state Angh, Jagdeep Dhankhar nata liasü, ta ketdangsertemi metetdaksü.

Victoria Memorial nung Ato kilonser tsüngdang telok aikati shilem balala agia liasü.

Honibarnep Rashtrapati Bhavan, New Delhi nunga linük Tir, Ram Nath Kovind-i Netaji Subhas Chandra Bose indang noksa ka sayaja liasü. Netaji sor 125 ajungba nüngtem nung küm piyong sentong agiyonga aotsü.

Netaji Subhas Chandra Bose-i linük atema nendaka inyakba nüngtem nung Centre sorkari pa asoba anogomong ya 'Parakram Diwas' anogo asütsü, ta sangdongogo.

EC-i sen tashi aser tashiyim mapa magizüktettsü: Sunil Arora

Kolkata, January 23 (Agencies): Assembly election agitsü aliba state-West Bengal nung election mapang nung tensa raksatsüa akok, ta yimtenren party aikati arendakba mapang nung Honibarnü Chief Election Commissioner (CEC), Sunil Arora-i, election mapang sen tashi amshiba, tashiyim amshiba aser sorkar machinery tim mesüi amshiba mapatem election commission-i khenyongi magizüktettsü, ta metetdaksü.

CEC-isa, West Bengal elections atema civic police volunteers meyoktsü, ta ashi.

State yimtiba, Kolkata nung osangbenertem den jembidang Arora-i, election mapang nung sen tim mesüi amshiba mita reprangtsü aser nokdangtsü atema EC expenditure observer-i mera agia inyaksü, ta metetdaksü.

Taküm April-May nung election agitsü aliba atema

terenemshiba asadangtsü atema ECI nungi team kati tang state semdanga lir; parnoki yimtenren party balala, sorkar ketdangsertem aser police ketdangsertem den senden aika menogo.

State nung election agitsü mapang ana nung lia mepetmesü adokba dak sendakba nung tasüngdangba ka langzüdang Arora-i, "Yimtenren dak sendakba nung ozüng alema inyakba mapatem onoki reprangshitsü," ta metetdaksü.

Yimtenren party balala sentongtem nung long agi ontepba aser raratepba dak sendakba nung tasüngdangba ka langzüdang pai, "Election agitsü anogotem sangdongba sülen ang commission-i maparen inyaktettsü. Onoki mera aika benoka inyaksü aser model code of conduct (MCC) tenzükba sülenbo bike rallies memelatsü," ta ashi.

Jelia central security

sepaitem state-i yoktsü asü, ta asüngdangba langzüdang pai, "Election agitsü ita ana-asem jelia sepaitem yoktsü, ta nenok dang shibai ashi. Onoki inyakyim shidak benschitsü aser nüngdakba mapang nung ang sepaitem yoktsü," ta ashi.

Election agitsü ano ita anasem jelia state nung tensa raksaba atema tebilemtsü kaa opposition party temi EC dang state nung election tiptema kanga junga agitettsü atema inyakdaksüner, ta mepishia liasü.

ECI-i Hokolbarnü Chief Secretary Alapan Bandyopadhyay, Home Secretary HK Dwivedi aser DGP Virendra nunger densema tongti ketdangsertem aika ajuruogo, ta Arora-i metetdaksü.

Paisa, state nung polling station 1,01,790 alitsü aser polling station shia nung matamabensartem nem maongka balaka agütsütsü, ta ashi.

Maharashtra sorkari Arnab Goswami anema legal teyari bushir

Mumbai, January 23 (Agencies): Republic TV editor in Chief, Arnab Goswami-i WhatsApp chat nung Balakot amakba indang jembiba jungkai adokba sülen aikati sorkar aitsüba mapang nung Honibarnü Maharashtra sorkari, Official Secrets Act nung ajemdaker Goswami nem temerenshi agütsütsü atema sorkari legal tsütsülen nungi teyari agidar, ta metetdaksü.

Mumbai nung osangbenertem senden ka nung jembidang Maharashtra Home Minister, Anil Deshmukh-i Centre sorkar dang, India sepaitemi Pakistan kübok Balakot amaktsü atema miim sentong yangluba osangji Arnab Goswami-i koma ser metet?, ta asüngdang.

Hokolbarnü Congress Working Committee-ia iba tatalokba ya Joint Parliamentary Committee (JPC) kati bushisüngdangtsüla, ta takhangba agüja bangzüng ka renema liasü.

Arnab Goswami aser taoba mapang Broadcast Audience Research Council (BARC) nung tongti, Partho Dasgupta na tsüngda whatsapp nung jembiba mapang Goswami-i 2019 küm India-i Balakot amaktsü aliba indang jelia

metetdakja liasü.

2019 küm February 26 nü Indian Air Force (IAF)-i Pakistan kübok Balakot nung JeM kiralongrartem indang training camp maaka liasü.

Maharashtra Home Minister-isa, "WhatsApp chat ajanga Arnab-i Balakot amaktsü aliba indang anogo asemnü jelia meteter aliba jangjar," ta ashi.

"Iba osangji Goswami-i koma ser metet, ta onoki Centre sorkar dang asüngdang, kechiyong item ama miim sentongji Ato kilonser, defence minister, Army tongti aser kanga tongti ketdangser kari dang meteta alitsüla," ta ashi.

Iba onük ya linük security den sendaktepa lir, anungji Centre sorkari telangzüba agütsütsüla, ta paisa ashi.

"Official Secrets Act, 1923 kübok state home department-i temerenshi agütsütsü akok asü makok, ibaji jangjatsü atema Maharashtra sorkari legal teyari agidar," ta pai ashi.

2019 küm February 14 nü Pakistan nung amenoka aliba Jaish-e-Mohammed-i Kashmir kübok Pulwama nung CRPF sepa 40 pokseta südaktsüba sülen India-i ibaji mangyanga February 26 nü Pakistan kübok Balakot amak.



New Delhi, January 23, 2021: Honibarnü New Delhi nung NSG contingent-i Republic Day Parade atema renemshiba noksa nung angur.

March ita nungi tang tamshidak sen 100, 10, sen 5 notes memenüngtsü

New Delhi, January 23 (Agencies): Reserve Bank of India (RBI)-i March ita tatembanglen mesüra April ita nungi tang tamshidak sen 100, 10 aser sen 5 notes memenüngtsü bilemdar, ajisiüaka tang tashi nungbo RBI-i osang tejangja memetetdaksü.

District Level Security Committee (DLSC) aser District Level Currency Management Committee (DLMC) senden nung jembidang RBI Assistant General Manager (AGM), B Mahesh-i, senpak 100, 10 aser 5 memenüngtsü, kechiyong RBI-i March-April nungbo itemji agientsü bilemdar, ta metetdakja liasü.

Sen 100, 10 aser 5 notes tejenba melen-a RBI-i item sen

tasen adoka tang market nung amshidar.

Tang amshiba sen 100 notes ya 2019 nü RBI-i adoka liasü. Demonetisation mapang nung timtem adokba ama timtem majurutsü atema sen tejenji maneni amshitsü saka RBI-i ibaji melena sen tasen adoka amshidar.

Sen 10 jandi (coin) dak sendakba nung RBI-i, sen ter jandi adokba sülen küm 15 jungaka shishilembartem aser shishirtemi iba sen ashshir, ibayongji bank tem aser RBI atema tebilemtsü ka kümogo, ta metetdaksü.

Sen 10 jandi ya magila, ta nisung aikati bilema ashshir aser tang tashi shishilembartem aser dokan kiburtemi rupee temaitsü maketba agi sen 10 jandi magir.



Lucknow, January 23, 2021: Honibarnü Lucknow nung Bharatiya Kisan Union-i Raj Bhavan-oa Centre sorkari benokba aluyimba ozüng tasen asem anema Uttar Pradesh Angh nem temepishiba shidi ka agütsütsü atema aoba noksa nung angur.



Changchun, January 23: China, Jilin Province kübok Dongchang District nung Jinchang yimtsüung nung alirtem nucleic acid tendangtsü atema tarensena ataba noksa nung angur. Yimti ajunga nung COVID-19 tashidak tanabenbuba tendangba sülen Tonghua yimtsüung nung nisung 88 dak COVID-19 tashidak potetogo. Hokolbar anonung ayaterem tashi nung nisung 361,648 dak tashidak tendangogo aser nisung 30,600 temang asadangtsü atema toktsüogo, ta Tonghua deputy mayor Jiang Haiyan-i ashi.

Joe Biden administration-i US-Taliban tenangzüktepba asadangtsü

Washington, Aenjeti/January 23 (Agencies): Joe Biden administration-i Honibarnü ashiba agi, parnoki taoba küm US aser Taliban na tsüingda tenangzüktepba yanglur aliba asadangtsü. Taliba-i kiralongrar telok den amteper inyakba toktsütsü nangzükba ama inyaker minyaker aser Afghanistan nung azütokshiba tajemba kümdaktsütsü atema parnoki asadangtsü.

Afghanistan nung azütokshi tali akümba aser tongtibang nisungtem amakba, koba Taliba dak tonglokja arudar, iba amala tensa ka nung US National Security Advisor tasenba Jake Sullivan-i phone ajanga Afghan Security Advisor Hamdullah Mohib den sensaksemba mapang iba tenangzükba agüja liasü.

Taoba hoptatem nung Afghan sorkar ketdangsürtem, lokti tentet balala lenirtem aser osangbenertem dak rangloker Kabul aser Afghanistan kübok tanga yimti balala nung bomb agi maka arudar. January 14 nü India-i Afghanistan nung lenirtem amakba anentsü aser teti atema yimjung bener arutsü asoshi ceasefire benoktsü atema ayongzükogo.

Sullivan-i, US-i yimjung inyakyim nongita yaritsü aser iba ajanga telok ana tsüingda yimden yimsüsüba nung tangatetep ka dangi arutsü aser teti atema ceasefire bener arutsü, ta ashiba US national security council sangdong ka ajanga metetdaksü.

Paisa, 2020 küm February ita US aser Taliban na tsüingda tenangzüktepba yanglur aliba United States-i asadangshitsü ta metetdaksüogo, kong Taliban-i kiralongrar tem den tesendaktep mayutsü nangzükba ama inyaker minyaker, Afghanistan nung azütokshi tajemba kümdaktsütsü atema aser Afghan sorkar aser tanga stakeholders tem den tajangzük kaa sensak asemtsü atema asadangtsü densema lir, ta kasa sangdong ajanga metetdaksü.

Afghanistan nung Taliban den sendaktepa aliba kiralongrar tem rongnung al-Qaeda aser Pakistan nung amendaker aliba Lashkar-e-Taiba (LeT) aser Jaish-e-Mohammed (JeM) densema lir. UN report ka ajanga ashiba agi, Afghanistan nung Pakistan nungi telungpur 6,500 shi lir.

Sullivan-i, Mohib dang ashiba agi, Afghanistan den longjemer inyaksü aser linük nung aliba nüburttem nem yimjung bener arutsütsü atema US bendanga agütsür lir. "Paisa, Afghan lenir ajak dang yimjung atema iba maongka agitsü America-i jangraba lemsatpogo," ta security council ajanga metetdaksü.

National security advisor ana yagi, yimjung inyakyim nung shilem ka ama Afghan tsür aser aiür chanutem aser lokti nung nütsüing agi ajema aliba kintem tejakleni oya aliba kümzüka ayutsü atema nongita yaritsü bangjem.

Afghanistan temeket nung

aliba linüktem rongnung India-i tenla timba agüja arudar aser USD billion 3 shi tenlatsü nangzüka lir. India-i joko mapang talangka Afghan-i aniba, Afghan meyong aser Afghan-i pusemba yimjung inyakyim ka pusemer ta shia aruogo.

Sullivan-isa, Afghanistan tarutsü tajungba ka atema Afghan sorkar, NATO NATO allies aser regional partner tem den sendaktepa inyaksü atema US bendanga agütsür lir, ta ashi.

Mohin-i Twitter ajanga ashiba agi, pa aser Sullivan na teti atema ceasefire benoktsü asoshi sensaksemogo aser security, counter-terrorism aser regional engagement dak sendakba nung longjemer inyaksü sensaksemogo.

Sullivan-i, Afghan sorkar den US partnership ya US national security nükjidadong atema kanga tongtibang lir ta ashiba pai lemsatpoba liasü.

Afghanistan nungi America nung sepaitem aninba dak sendakba nung US aser Afghan ketdangsürtemi kecha osang magütsü. Taoba tir Donald Trump-i tuyuba ama Afghanistan nung US sepai 2,500 dang lir koba küm 19 tsüingda tang tajemba asütsü.

Qatar nung taoba küm February ita 29 nü Taliba den tenangzüktepba yangluba mapang Afghanistan nung US sepai 13,000 shi liasü. Iba tenangzüktepba kübok America nung sepaitem May ita tashi nungbo linük toktsür aotsü züingzüktep.



nisung talila 81 dak tashidak potetba metetdaksüogo. Tang tashidak potetertem rongnung parnok 78 menatepyonga aoba aser nisung 35 tashidak menaba tera mejangjai lir.

Hong Kong, January 23: Yuen Long, Hong Kong nung Medical worker tem COVID-19 nucleic acid testing station nung tenüing züingoksemba noksa nung angur. Hong Kong nung Honibarnü COVID-19 tashidak menar 10,000 adenogo. Hong Kong's Center for Health Protection-ia

MULUNGNEN O



Tasoba
anogo :
1930

Tasüba
anogo :
14.01.2021

Tsürabur **LATE IMTONGZÜKBA** (Chuchuyimlang) January 14, 2021 anogo, akümüli wadang renemer teti anisüingzükdaki ogo.

Onok shisa bulu mangyim tia nung alidang, kija, kibong, kiyonger, temeimer, arogo aser lokti balalai tamang sarasadem, nübu, shisatsü aser rongsen agi yariba asoshi nenok ajak dang pelaba lemsateper.

Teyanglur Tsüingremi nenok ajak moajangma.

Temeim Chirnur, Semchir aser Kinünger.

Portugal nung tir election Jan 24 nü agitsü

Lisbon, Aenjeti/January 23 (Agencies): COVID-19 wara ajanga linük nung tenokdangba tesashi agütsür nüburttem timba pei kidang nungi mainshi aliba mapang Portuguese nungertemi Deobarnü tir tasen ka shimtsü, ajisiuka nisung aikati election ayongzüka agiba ajanga tashidak tali menatepa aotsü ta tsübua bilemer aser nisung aikabo vote agütsü marutsü ta bilemer.

Nütsüingyongsük million 10 aliba linük kong wara pokteter mezüingbuba wave nungbo tanga linük dang nungi tajungba azüokteta aruogo, iba linük nung anogo tenetnübuba nisung aika dak tashidak potetba den asür aika kümogo.

"Ano ita ka atara tebilemtüsü. Tensa mapa majungba mapa iba dak apet jenjang agitsüla," ta Lisbon nung alir Miguel Goncalves-i ashi.

Vote agütsür ana nung asemsüibo election thinentsüla ta bilemba, ISC/ISCITE institute-i bushitsüingdang nung ngutetba taoba hopta sayaogo.

Election agitsü thinenra linük temzüing özüing melenshitsüsa akümtsü, koba ketdangsertemi ashiba agi mapang atsüra asünung tamakoktsü asütsü. Ajisiuka tir election agitsü atema

telemtetba agiba atema taitüsü aika ajangshidar.

"Parnoki vote agütsütsü atema anogo timba kümdaktsütsü nung jungla. Election thinentsü mesera koma renema lir iba amaji dang agitsüla ta bilemba ya aibelen ka lir," ta IPRE-NOVA University nungi political scientist Joao Cancela-i ashi.

Linük mokdanga ayutsü atema tetuyuba agütsür aliba kübok nüburttem jongdak nüngdak mapa atema senzusenpong melaba dak alia vote agütsütsü atema dang nüburttem pei ki toktsür aotsü melatsü.

Taküm tir election nung nüburttem aikatibo shilem magitsü ta bilemer. Protective gear semer voluntary team temi quarantine nung aliba voter 13,000 shi aser taoba mapang vote agütsütsü atema züingoksemer alir 250,000 shi ki tonga oa ballot bendenogo.

Opinion poll ajanga centre-right Social Democratic Party nungi tir Marcelo Rebelo de Sousa-i election mela mela akoktsü ta sayuogo aser pa sülen left-wing candidate Ana Gomes tanabuba nung aser far-right party lenir Chega Andre Ventura tasembuba nung asütsü ta sayuogo.

Norway sorkari Oslo temeket nung tenokdangba agütsür

Oslo, Aenjeti/January 23 (Agencies): Kanga kara menatepyonga aoba coronavirus tashidak tapu tasenba nokdangtsü atema Norway nung sorkari linük yimtiba temeket nung tenokdangba tesashi agütsüogo. March 12 nungi tang tashi nung January 23 nü tenokdangba agütsüba ya tesashitiba asütsü.

Dokan ajak, cinema, restaurant aser tekülemdak ki ajak aser yi ajemdak ajak January 31 nü tashi shibanga ayutsü, ta Health Minister Bent Hoie-i, Honibarnü webcast speech ka ajanga metetdaksü. Amateur saisapong aser südoksünema kazütepba kecha memelatsü.

"Tensa kanga mejungi kümogo aser tashidak prokshia meyoktsü atema takokba tashi inyaksüla. Mesen tasenba Oslo nung prokshia ora linük nung tanga tesemi prokshia ao nokdangtsü atema

tasak asütsü," ta Hoie-i ashi.

2020 küm tanga linük tem dang nungi wara tajungba azüokteta aruba sülen Norway nung Christmas benjung sülena kidanger Sweden aser Denmark den medemdangra tashidak kanga bulua prokshia meyoki azüokteta lir. Tashidak tapu tasenba ya Hokolbarnü Oslo arrtsü nung aliba Nordre Follo kübok nursing home ana nung potetogo aser tashidak menaba tera mejangjai lir.

Tetuyuba tasen agütsüba kübok aonsotsü ayokdak, mozü ayokdak aser totzü ayokda lapoktsü melatsü aser asüpila sentong agitsü asoshi melatsü. Tashidak tapu tasenba ya takaraba menatepyonga aoer ta angateta jenjang tasen agiogo, ajisiuka iba ya taoba mapang dang nungi tesashibabo masü, ta health minister-i ashi.

25

Years Together



Intiwati & Watinara

24 JANUARY 2021



Tanü ajuruba temoatsütem manung yashi anogotem bilemteta aser asüng teimla nung pelatepa amongba anogoji tanü lir.

- Temeim Chirnur & Kinungertem.

Security Forces-i NSCN (IM) telungpur ka apu

Kohima, Aenjeti/January 23, 2021 (TYO): Hokolbarnü (22.01.2021) Security Forces den police nungi teshimtet nübu longjemer Purana Bazar, Dimapur telungtet nung General Area mita aoba mapang, NSCN (IM) telungpur ka apu, ta sangdong ka ajanga metetdaksü.

Osang tejangja ka angazükba nung ajemdaker, Security Forces den Police nungi teshimtet nübu longjemer general area, Purana Bazar mita ao aser iba mapang parnoki NSCN (IM) telungpur ya apu. Pua alisang ket nungi point 22 Pistol ka, point 22 injang asem, sen 43,200/- alang Spasma Proxivon Capsule 2300 aser sen 1,56,500 ngutet.

Iba maparen dak sendakba nung maneni bushisüngdangtsü atema, pua alisang aser pa ket nungi ngutetba oset ajak East Police Station, Dimapur nung agütsüogo.

Maneni, tanga sangdong ka ajanga angazükba agi,

Hokolbarnü, Assam Rifles aser Police nungi teshimtet nübu longjemer Model Village, Tisephema kübok general area mita aoba mapang NSCN (KN) indang telungpur ka den prangbongtem aser temesepba mozütem apu.

Osang tejangja ka angazükba nung ajemdaker Assam Rifles aser Police team kati iba tesem mita ao aser NSCN (KN) telungpur ka apu aser pa ket nungi point 22 Rifle ka, point 22 Pistol ka, Air Rifle ka, Single Bore Rifle ka, point 22mm injang 40, Air Rifle Pellets 299, sen 15,920/- alang Spasma Proxivon capsule 199, sen 45,000/- alang Drug Orange Powder (Sunflower) ka aser pungdang tilala 15 aser sen 1, 43,500/- ngutet.

Iba maparen dak sendakba nung maneni bushisüngdangtsü atema, pua alisang aser pa ket nungi ngutetba prangbong aser tanga oset ajak Medzephema Police Station nung agütsüogo.

Realme C20 sayaogo

New Delhi, Aenjeti/January 23, 2021 (Agencies): Realme-i parnok indang budget C-series lineup nung Realme C20 smartphone bendenlokba sangdongogo. Iba device ya Vietnam shishilembadak saya aser smartphone jenjang dalang asütsü, kong entry-level specification tem dena lir. Iba smartphone indang tongtiban feature rongnung, MediaTek Helio G35 SoC, selfie aser rear camera den 5,000mAh battery dena lir. Realme C20 smartphone ya sentsü ana nung angutsü.

Design, tsütsü reprangdangra, Realme C20 nung IPS display panel inoka yanglutsü, kong waterdrop notch asee narrow bezels dena lir. Iba smartphone tasazük inch 6.5-alitsü aser 720x1,600 pixels resolution den 20:9 aspect ratio angutsü. Realme C20 inyakyim ya MediaTek Helio G35 SoC den 2GB RAM aser 32GB onboard storage ajanga nungittsü. Memory ulua aginürtem atema microSD card ka ajanga internal memory ya 256GB tashi atsülanga amshitettsü.

Camera atema, iba smartphone tesülen 8-megapixel camera sensor ka den f/2.0 lens aser LED flash inoka yanglutsüogo. Selfie aser video calling jangrartem atema, iba phone tejaklen 5-megapixel selfie camera sensor keta lir.

Realme C20 maparen 5,000mAh battery ka ajanga nungittsü. Iba smartphone nungsa Micro-USB port aser 3.5mm headphone jack dena lir. Iba den bendenloksema, smartphone ya Realme UI - Android 10 ajanga achaayangtsür.

Vietnam nung iba smartphone jenjang VND 2,490,000, koba India sen 7,800 alitsü. Realme C20 ya Blue aser Gray colour option nung angutsü. Tang tashi nungbo, Realme-i iba smartphone tanga shishilembadak sayatsü asoshi osang agüja mali. Kasa mapang, India nung China indang tech company yagi parnok indang budget C-series kübok smartphone aika yokdaki. India nung customer temi sen 9,999 yong Realme C15 aser sen 7,499 yong Realme C11 teyokdak lir.

Glastonbury Festival 2021 athir

London, Jan. 23, 2021 (Agencies): Covid-19 dak sendakba nung tetsükdaksü balala ajuruba ajanga, Glastonbury festival sentong ya küm tanabuba atema thitsütsüsa akümer.

Brehostibarnü (21.01.21) iba sentong achaayanger, Michael aser Emily Eavis nati iba festival tenzüker küm 50 ajungba sentong thitsüba osang sangdongogo. Tang UK nung, iba wara tensa tamajungba küma aoba asadanteta aser iba tashidak menatepba nungi nüburtem kümzüka ayutsü asoshi tenokdangba tesashi aliba ajanga küm tanabuba atema iba sentong magitettsüsa akümer.

Iba sentong nung Taylor Swift, Sir Paul McCartney aser Kendrick Lamar densema artist balalai shilem agitsü renemer liasü.

38 BUBA

ONGPANGKONG KAKETSHIR MUNGDA
SENDEN SENTONG

Omen: Rangben Temelenshi (Holistic Development)

ANOGO: 28TH JANUARY, 2021
TESENTEPAK: TOWN HALL, MOKOKCHUNG



Mungdang Meren:

Wb. Limawabang Jamir
Deputy Commissioner, Mokokchung

SENTONG- I
Mapang:(09:00-10:30)

OKM NÜKLU KEN

- Sentong lenir : Mendenpurtem
- Lai zünger sarasademtsü : Kr. Rachel
Asso. Pastor Women, Kumlong Baptist Arogo
- Tarur pela agizükba : Sb. Talitemsu Lkr
Tir, OKM
- Metetpela Mapang : Sb. Pangerzulu
Metetpela zülur, OKM
- Tepela O : (a) Wb. Tsüktimeren
Tir, OM
(b) Wt. Talichula
Tir, OWM
- Achievers' Award : Sb. Limatongzük
Shisaliok Zülur, OKM
- Nüngo Kaket Sala/ Mungdang Meren O : Wb. Limawabang Jamir
Deputy Commissioner Mokokchung

SÜNGO AJEMBA MAPANG (10:30-11:00)

(11:00- 11:45)

Tetsü Oshi Tetoktepba (2018-2021)
Sentong Ralok

SENTONG- II
Mapang- (11:45-01:45)

PANEL DISCUSSION
TOPIC: "TEJAKLENI RAKETA OTETBA YIMLI ASOSHI SHISAMULUNG TASEN"

(Renewing Mindsets For A Thriving Society)

PANELISTS

Wb. Kreho Athili ,
Lead District Manager, Mokokchung & Longleng.

Wb.S. Amarjit Mangang ,
DDM, NABARD Mokokchung.

Dr. B.M. Sunep,
Chief AH & Veterinary Officer Mokokchung.

MODERATOR

Wb. Akok Walling

LOKTI CHIYUNG

Mapang- (01:45- 02:30)

SENTONG-III

Mapang- (02:30- 04:00)

LOKTI SENDEN

SENTONG-IV

Mapang- (05:00pm)

- Sentong Lenir : Mendenpurtem
- Lai zünger sarasademtsü : Rev. K. Temjen
Pastor, Khensa Baptist Arogo
- Tepela O : Sb. Nungdokyanger Ao
Tir, AKM
- Temeja Ken : Tebenjem
- Onük : "Rangben Temelenshi Asoshi Tsüngchi Lanur"
(Youth With Integrity For Holistic Change)
- Tejembir : Dr. Awala Temshi
Administrator, Straightway
Christian Mission Centre, Mokokchung
- Osangtem agitsü
- Enküp O : Wb. Limaonen Imchen
Convenor, Planning committee
- Menden Melentepba Mapang: Lenir, Nüngtet Luden

Media Partner



G.Rio Memorial: Peren-i run 72 agi Zunheboto kokogo



Dimapur, Aenjeti/January 23, 2021 (TYO): Honibarnü, 1buba G. Rio Memorial U-19 (Boys) Inter-District Tournament - Group B telemsa tanünübuba asaya nung Peren aser Mon nati kokogo.

Mezüngbuba asaya, Peren aser Zunheboto asaya liasü. Toss koka Peren team-i mezüng bat asütsü shim aser parnoki over 25 nung run 156 yanglua asayar 7 out süadok. Peren atema Parbez-i run 68 aser Vicky-i run 30 yanglu.

Zunheboto team nungi bowler Hito Assumi, Kito Zhimo, Alopü Aye aser Hitoki Assumi nungeri wicket ka ka agi.

Tanabuba innings nung Zunheboto team pur over 20.5 nung run 84 dang yanglur asayar

ajak out süadok. Team atema Nighato Yeputho-i run 23 aser Abhishek-i run 21 yanglu.

Peren nungi bowler Roko Nyekha-i wicket 6, Om Sangma-i wicket 3 aser Ranjen-i wicket 1 out sütsü.

Iba asaya Peren-i run 72 agi takok angu.

Kasa anogo, tanabuba asaya Mon aser Wokha na asaya. Toss koka Mon-i bat asütsü shim.

Over 25 nung Mon team-i run 153 yanglur wicket 8 out süadok. Mon atema Altab-i run 52 aser Airong Konyak-i run 26* bendenloksü.

Wokha team nungi Lichumthung Patton aser Eren Ezung nati wicket anana; aser Randanbemo Odyuo aser

Noyingthung Kikon nati wicket ka ka agi.

Tanabuba innings nung Wokha-i over 25 nung run 125 yanglur wicket 7 out süadok. Wokha team nungi Mhao Tsanglao (wk)-i run 51, Chumrenthung Lotha-i run 18 aser Noyingthung Kikon-i run 14 yanglu.

Mon nungi bowler Shejong Konyak-i wicket 2 agi. Kasa mapang, Altab, Airong Konyak aser Anyeang Konyak nungeri wicket ka ka agi.

Iba asaya Mon-i run 28 agi kokogo.

JANUARY 24 NÜ ASAYA:

1buba asaya (7:30 A.M) : Peren vs Mon

Tanabuba asaya (11:45 A.M) : Wokha vs Zunheboto

Thailand Open: Satwiksairaj o Shetty na Semi-final nung tsük



Bangkok, Aenjeti/January 23, 2021 (Agencies): Tokyo Olympics nung medal atema tokteptsü pur India nunger tarep - Satwiksairaj Rankireddy aser Chirag Shetty na Honibarnü Toyota Thailand Open Super 1000 asayamung semi-final nung tsükogo.

World no. 10 India nunger tarep, shirnoki 2019 küm French open super 750 event final nung asaya aser taküm Thailand nung mezüng super 500 title takok angu, tena ya 18-21 18-21 agi world no. 9 Malayasia nunger tarep Aaron Chia aser Soh Wooi Yik nati tsükdaksü. Iba asaya minute 35 nung tembang.

India nunger tarep yagi 2018 aser 2019 Super 1000

asayamung nung shilem agi, saka taküm tenati semi-final tongtetba ya mezüng alitsü.

Künati bilemba ama junga masayatet. Game tanabuba nung tasa melenshir asayatsü merandang. Tena (Chia/Woh Wooi Yik) asayar takoktet lir aser yamaji asaya aika nung tenati shilem agia aruogo. 2019 küm All England asayamung final nunga tena asayaogo. Point angutsü atema meranga toktep aser künati teraka süngjema asaya asübo point timba ngur lila. Iba tamakok ajanga tezütanger, saka semifinal tongteta asayatsü maongka anguba asoshi pelar," ta asaya temer sülen, Satwiksairaj o Rankireddy

nati ashi.

Iba asaya mezüng game nung Satwik aser Chirag na 4-2 agi tejakdang ser asaya tenzüik, saka Malaysia nunger tarep yagi tena menepa point 11-10 agi ajatet. Satwik aser Chirag nati 15-16 tashi meranga asayaba mapang, Chia aser Yik nati point pezü tashi atonga ngua iba game koktet.

Semifinal tashi tongteta asayatsü maongka anguba asoshi pelar, saka tanü künati bilemba ama tajungtiba masayatet. Service nung künati point aikabo mengutet, saka tenati zükloksübatem junga agizüik. Künati tera kara point timba ngua aser mezüng game akok asübo, bilemba ama iba asaya balaka temer alitsüba ta nibo bilemer," ta Chirag Shetty-i ashi.

Game tanabuba nunga, India nunger tarep ya point 3-1 agi tejakdang ser asaya, saka Chia aser Yik nati kara kara dang point pezü tashi atonga ngua 7-3 agi tejakdang kumadok. Satwik aser Chirag nati ano meranga tena den toktep aser iba mapang parnok tsüngda point 8-8 kumadok. Ajisüaka, smash ana zükloksüba ajanga Aaron aser Soh na nem 'three-point advantage' angu.

Tokyo Games ayongzüksü ajaki mulungteter lir: IOC Chief

Tokyo, Aenjeti/January 23, 2021 (Agencies): Taküm July aser August nung Tokyo Games asayamung atalokdaksütsü asoshi Olympic nung sendaktepa alir tentet ajaki mulungteter lir, ta International Olympic Committee (IOC) President Thomas Bach-i video ajanga ashi.

Hokolbarnü (22.01.2021), Britain indang Times sangdong nung, aikati aija aser memulungba ajanga Tokyo-i iba Games mayongzüksü ta agütsü. Iba osang dak sendakba nung Japan sorkari aitsüogo, kasa mapang Japan Olympic Committee tekolakba, Yasuhiro Yamashita-i Reuters dang, iba osang ya "tiyazü" aser "tai" ta shiogo.

Bach-ia, taküm July 23 nungi tenzüka August 08, 2021 tashi iba Games ayonga asayatetsü imlar, ta lemsatepogo.

"Iba Games tenzüksü ita trok tejakdang nungi, Olympic nung inyaker ajungai July 23, 2021 nü iba asayamung lapoktsü asoshi yongya atadar," ta Bach-i ashi.

"Tanü, National Olympic Committee 206 den jembitsü maongka angu aser parnok ajaki iba Games ayonga asayatsü asoshi mulunga lir aser yongyar. Iba den külemi, onok mapatong nung Japan sorkari-a pusemer. Yashi IOC züngsem ajak den tebilemba asüngdangtepa jembishinüogo aser ajaki Olympic Games ayongzüksü asoshi mulungteper. Onok ajaki meranga inyakdar aser bilemba ama maparen ajak takok ngua odar; aser tongtibangtibi iba Games atema shilem agir ajak iba wara lendongbang nungi kümzüka yutsütsü asoshi onoki inyaksü," ta Bach-i ashi.

Japan nung Covid-19 wara tasemben adokba ajanga linük tesem timbaka nung 'state of emergency' sangdonger lir.

Iba Games tenzüksü asoshi junga züngzükteptsüla, ta pai ashi. Ajisüaka, virus anema mozütem peria mangudang yongi alima tesem ajungalen tongtibang saisapong asayamungtem asaya tenzükogo, ta pai metetdaksü.

Thailand Open: Carolina Marin final-i iogo



Bangkok, Aenjeti/January 23, 2021 (Agencies): Honibarnü, Thailand Open tetsür kija Semi-final asaya nung, Spain tsür seed pungobuba aser taoba mapang world number 1 Carolina Marin-i South Korea tsür An Se-young madak 21-19, 21-15 agi takok ngua final tongtetogo.

Tang, world no. 6 nung alila arishi küm 27 tain Marin-i tan hopta asayamung nung title tanabuba atonga takok angutsü asoshi meranga asayadar, koba Bangkok nung atonga asayaba asayamung asem nungi tanabuba alitsü. Taruba hopta indang World Tour Finals nung iba asayamung tembangtsü.

Taoba hopta, Marin-i top seed Tai Tzu-ying madak takok angu aser Honibarnü lai maneni shilem tajung agia An madak

semifinal kokogo.

"Asayamung ka takok ngur sülen anogo asem dang lir asayamung ka nung asaya tenzüksü ya khen khenbo kanga tasak," ta asaya temer sülen, Olympic nung takok angula Marin-i ashi.

Semi-final masayadang, taoba hopta asayamung nung Marin aser An na asayaogo, kong Marin-i ayong ayonga dang 21-18, 21-16 agi An akok. Arishi küm 18 tain An, shibai 2018 küm "Most Promising Player" award angu, Honibarnü la tamakok anguba sülen, aika temulung raksaogo.

"Lai zükloksüba smash ajak nokdangtsü asoshi ni tasa ajak amshia asayatsü merandang. Ajisüaka, tia makai ni bilemba ama masayatet, ibajagi ni tera mepelar," ta An-i ashi.

BILEMDANGANG

"Temoatsü aser tepela nung dangbo takümji malir."